

EI FAURAÒ NO TE FEIA REO ÒRE



Ia ora na e hoa here mā i te aroha mau no te Atua, outhou e te mau taeaè, te mau tuahine taiò "Veà Porotetani".

I te ômuaraa no teie matahitia 1984, ua manaò te Faatereraa o te Etaretia, na roto i ta na tomite veà i te faanaho faahou i te hōhoa e i te huru no ta tātou "Veà porotetani". Ua hinaaro o ia ia riro ei veà tei ànaànataehia e te mata ia hiò e ia taiò. Ua hinaaro atoà o ia ia riro ei reo parau e ei mata hiòpia i te mau òhipa atoà e tupu nei i roto i ta tātou Etaretia, i nià i to tātou nei fenua. Ia au mai ta outhou atoà i ite, eere teie i te haa òhie. Te tiâturi nei rā te Faatereraa e te tomite haapao i te veà e, na tātou paatoà teie òhipa e rave.

Eita e òre, e mau manaò ta outhou e hinaaro nei i te parau, mea tià roa ia outhou ia faaite mai, ia fanaò tātou pāatoà i taua mau manaò ra. I reira atoà ia mātou, te feià e òhipa nei no te veà, e ite ai e, e aha mau na rā te hiaai o te taata. No reira, ia riro mau teie nei veà ei taura tāamu ia tātou, ei vāhi i reira tātou e faaite ai i to tātou mau manaò, eihia rā ei vāhi faahaparaa, faaino raa i te taata.

Ua mairihia teie veà e "Veà porotetani" no te mea, e veà na te Etaretia evaneria no Māohinui, e veà pāpalhia e te taata māohi, te taata porotetani. Ia riro teie nei veà ei fauraò no te manaò o te feià tei pārahi māmū noa, e ei veà hoì no te haapii

ia tātou tātou iho, ei veà no te haafarereiraa i te nūnaa, ei veà atoà rā no te pātoi i te hape, te hapa e te hara, i te mau vāhi atoà tei reira taua mau mea nei.

O te auraa mau ia no te ioà "Porotetani". E veà na te feià tei faaea noa na ma te parau òre, e veà na te feià aore e faaroohia nei ta rātou parau, no te mea, aita e vāhi ei reira ta rātou parau e to rātou mau manaò e tauàhia mai ai.

Aita e taotiarraa no te mau manaò, te mau parau, no roto mai i te mau tuhaha, te mau parau no te oraraa o te taata, te parau a te Atua, te mau parau âpi no te ara mai, no roto mai i te mau Etaretia e te vai noa atu ra.

E faaroo to òe e te taata porotetani, eihia òe e taià no te fai. E manaò to òe, a parau. E faanahoraa ta òe e tiâturi nei no to òe oraraa, eihia e huna. E piti reo tei manaohia no ta tātou veà : reo māohi, reo farani. E faarahihia iho ā rā te tuhaha reo māohi, no te manaò e te vaira to na faufaa rahi, ua manao-atoà-hia te reo farani no te feià ia tei òre i ite i te reo māohi, no te feià eere te reo māohi i te reo no rātou.

A taa noa atu ai te parau no te veà iho, te hinaaro nei te Faatereraa o te Etaretia i te tahoë mai i ta na mau tamarii i roto i ta na mau òhipa e ta na mau opuaraa. Eita e òre teie te tahi tāpao matāmuia no te tupuraa taua manaò ra. E vāhi atoà teie e tupu ai te tauàraa parau i roto i te Etaretia, e ta na feià âpi, inaha na roto i teie nei mau farereiraa e tupu ai te tahi bāoaraa i roto ia tātou pāatoà. Te tiâturihia nei e e maoro te aho no ta tātou nei veà. Na te Fatu te reira e tauturu mai.

I te ioa o te Apoora Faatere Marurai Utia orometua.

QSS ... Vos photos couleur en 1H.

Sur simple appel au 3.61.11

UN PHOTOGRAPHE PROFESSIONNEL
POUR IMMORTALISER
LES GRANDS MOMENTS DE LA VIE.

MARIAGES - BAPTEMES - COMMUNIONS

Centre Vaima-Papeete

OUVERT SANS INTERRUPTION DU LUNDI AU VENDREDI DE 8H A 18H ET LE SAMEDI DE 8H A 12H.

